





ph





# DISCOVERS

TOUCHANT LE

DROICT ANNUEL

*Presenté au ROY.*

22



A PARIS.

Chez DENYS LANGLOIS, au  
mont S. Hilaire, à l'enseigne  
du Pelican.

Case

F

39

326

1629 di

THE UNIVERSITY  
OF MICHIGAN





DISCOVERS  
DV DROICT ANNUEL  
*présenté au R O Y.*



IR E,

L'histoire nous  
apprend qu'un  
grand peintre de  
l'Antiquité ayāt

faict le portraict d'un guerrier, fit  
sonner la trompette au ton des ba-  
tailles, & voyant les courages de  
ceux qui accouroient de toutes  
parts animez par l'imagination &  
le souuenir des combats, leur ex-  
posa son tableau, qui fit iuger l'ex-  
cellence de l'ouurier, par la beau-  
té de l'ouvrage.

La renommée trompette de vo-

A ij

stre gloire (SIRE) ayant espendu vos victoires dans l'Vniuers, & ietté parmy les esprits de tous les peuples de la terre habitable l'admiration de la puissance de Dieu en l'alliage des vertus de vostre Maiesté qui estes son image viuante, vous esleue aujourd'huy dás le liét royal de l'Hóneur, & de vos belles actiós passées forme les esperances de celles qui sont à venir.

La paix laquelle vous auez donnée à vos subiets par vostre clemence, qui a serui d'assaisonement à vostre valeur incomparable, relevant dans les ruines des desordres passez les fondemens solides d'un heureux reestablisement des affaires; les esprits des hommes dans leurs diuers interests y messent les differentes affectiós d'esperance & de hayne, & peu de charité; & dás la diuersité des proiets des vns



& des autres tous concurrent en ce poinct de ruiner les officiers de vostre Royaume, comme si le debris des officiers estoit suffisant pour satisfaire à leurs desirs, qui n'ont que leur profit particulier pour obiet, & le public pour pretexte.

Aux Estats tenus à Paris en l'an 1614, le Clergé & la Noblesse s'arrestèrent fixement à ce poinct, comme si la restauration du royaume eust dépendu seulement de ruiner le tiers Estat, duquel les Officiers font la plus grande partie.

Pour représenter donc fidelemēt à vostre Maiesté les raisons pour maintenir ou supprimer la venalité des offices avec le droict annuel, il est nécessaire d'en marquer sommairement l'origine, & de monter iusqu'à la source.

La faineantise des successeurs de Charlemagne ayant attiré le mes.

pris & la desobeïssance des peuples, la France raccourcie au deçà du Rhin a long temps soupiré souz la diuision de plusieurs Roitelets.

En fin Hugues Capet autheur de vostre famille depuis pres de sept siecles, estant paruenue à la Corone, l'Estat dans son reestablissement a esté porté iusques au poinct de sa ruine, la Noblesse s'estant emparée des Gouuernemens en propriété, dont elle luy fit hommage.

C'estoit vne profonde playe à la Royauté, suiuiue d'une autre encore plus dangereuse, en ce qu'il donna la Iustice (en laquelle consistoit le plus beau fleuron de la Couronne) en propre à la Noblesse; & deslors la Iustice passa en reuenu particulier, & en art de profiter.

Durant les perilleuses guerres de Philippes Auguste contre les Anglois qu'il recogna dans leur Isle; &



contre les Albigeois, lesquels par vn artifice nouveau se seruoyēt de la superstition pour apprendre aux peuples à desobeir à leurs Roys; la venalité des offices s'estant introduicte dans la confusion des partis, & la balance consignée entre les mains de la Deesse de Iustice imaginée par l'Antiquité n'estant employée pour examiner le droict, mais pour peser l'or & l'argent: le Roy saint Lo v i s apres qu'il eut esteint cette faction Albigeoise, & soulagé ses peuples laz & recreus souz le faix & la fatigue des lōgues guerres qui auoyent appauuri le Royaume, effaça la memoire de ce trafic, & redonna le prix à la Vertu, laquelle estoit au parauant esclauē des richesses. Il fit en outre des reglemens pour la Iustice qui sont paruenus iusqu'à nous; & pour cōble de pieté il donnoit luy-mesme

l'audience à ses subiets , & faisoit droict sur leurs plaintes par leur bouche.

Ce grand Roy,lequell'Eglise honoroit pour son protecteur , les armes pour leur Mars , la Roynne pour vn parangon de chasteté , ses enfans & ses freres pour principe d'amour & de charité,&ses peuples autāt pour leur pere que pour leur Roy,receut la benediction du Ciel en la lōgue durée de sa maison , qui a produit la famille Royale laquelle a duré de masse en masse en ligné directe iusques au Roy Charles le Bel , la maison des Valois qui a duré en ligne directe iusques au Roy Charles huictiesme , les deux maisons d'Aniou perdues dans les conquestes des royaumes de Naples, Sicile, & Hongrie , desquels la maison d'Austriche s'est emparée, la maison de Bourgogne, les grāds  
Estats



Estats de laquelle , avec l'Empire  
ont fondé la grandeur de cette  
maison d'Austriche parée des pie-  
ces & prouinces de la France , la  
maison d'Orleans esteinte en li-  
gne directe en la personne du Roy  
Louys XII; le surnom duquel Pere  
du peuple marque la vertu de ce  
grand Monarque; & cette maison  
d'Orleás en ligne collaterale a pro-  
duit le Roy FRANÇOIS I. la famille  
duquel a eu son cours iusqu'au Roy  
HENRY III: Et en suite ce Roy sainct  
no<sup>9</sup> a prouigné la famille des Bour-  
bons, laquelle a donné à la France  
le Roy HENRY LE GRAND vo-  
stre pere; la valeur & bonne fortu-  
ne duquel a preserué la France qu'  
elle ne soit tombée au cantonne-  
ment auquel elle estoit du temps  
du Roy Hugues Capet, & le Roy  
vostre pere a esté plus heureux en  
ce qu'il a conserué l'autorité roya-

le en son entier.

L'infirmité humaine fait voir aux plus fortes & vigoureuses natures qu'il y a de l'homme; & ce grand Roy S. Louis fait vne faute signalée en ce qu'il rendit au roy d'Angleterre la Guienne cōquise par les armes de son ayeul Philippes Auguste avec tant de fatigues & de doubteux euenemens qui auoyent espuisé le plus pur sang des François, & arma son plus mortel & capital ennemy contre soy mesme: faute d'Estat qui a porté le nom François iusqu'aux aduenues du tombeau, & qui n'a peu estre entierement réparée que par la prise de Calais, s<sup>o</sup> les heureux auspices du Roy Henry II.

Charles V. dict le Sage s'est trouué aussi inegal en la force de son esprit, en ce qu'il a rendu Philippes son frere Seigneur des Estats de



Bourgogne, au lieu qu'il les deuoit incorporer à la France, & luy mesme en espouser l'heritiere: Mais les bons conseils naissent plustost dans le Ciel que dans le discours de la raison humaine.

A peine l'Anglois fut renfermé dans les bornes naturelles de son Isle, excepté Calais qui luy demeurera pour leuain de ses entreprises, & pour fomen-ter les factions dans cet Estat; Que la maison de Bourgogne ayant passé en celle d'Autriche produisit des effets sanglans des guerres effroyables entre le roy François I. & Charles V. Emper. continuée avec pareille ardeur entre le Roy Henry II. son fils & Philip-  
pess II. Roy d'Espagne.

La mort inopinée & fatale du Roy Henry II. remit la France à l'encherre, qui fut l'exercice de l'ambition ciuile & estrangere, fomen-

tée par les artifices de ceux qui se seruoient de la Religion pour vn art de tromper, & changer la Royauté en vn Estat populaire, durant que les autres se vouloyent cantonner, & morceller les grandes & riches prouinces de cet Estat, & les autres vouloyent introduire vn changement en la famille Royale pour s'emparer de la Monarchie entiere.

Les maladies de cet Estat ont attiré les desordres qui ont esté dans l'Eglise durant les schismes & diuisions d'icelle, & la France occupée à sa propre defenle ne se pouuoit diuertir à d'autres affaires. Durant ce temps les resignatiōs des benefices en faueur de tel successeur qu'on vouloit choisir ayās passé en droict cōmū, ont aussi attiré en suite les resignatiōs des offices, & le choix des successeurs, & les vingt iours desirez ez resignations en faueur faictes



en Cour de Rome, ont doublé ez resignations des Offices, pendant que par le mesme abus les successions s'introduisoient aux Gouvernemens par le moyen des survivances, & portoyent insensiblement l'Estat à la confusion & au cantonnement du temps qu'Hugues Capet parvint à la Couronne.

Le Roy François I. ayant toute l'Europe coniurée contre luy, & estant obligé de faire de nécessité vertu, fut contrainct de creer plusieurs Offices afin de soulager les peuples chargez des Tailles & des Aydes, & ne trouva autre soulagement plus prompt que dans l'ambition de ses subiets; les riches contribuans gayement leur argét pour paruenir aux charges: Et le Roy Henry II. continua le mesme dessein par la creation des Sieges Presidiaux, & autre grande quantité

d'Officiers, dont il receut vn grand soulagement en ses affaires.

La mort funeste du Roy Henry II. l'ambition des grands, & le dessein de ceux de la Religion pretendue Reformée d'establir vn estat populaire en la France, ont mis les choses saintes & prophanes en commerce, & deffors on a commencé ouuertement de mettre les charges en party, afin d'y acquerir des creatures; & particulièrement ceux de la Religion pretendue Reformée ont exercé ce trafic avec vne opiniastreté si visible, qu'elle a tousiours esclaté en factions par cette maxime d'Estat, QUE L'AVTHORITE MAINTIENT LES PUISSANCES.

Le feu Roy d'heureuse memoire ayant calmé les orages estrangers, appaisa les dissensions ciuiles, mais il ne les esteignit pas: Et ce grand



Roy, quoy que valeureusemēt ser-  
ui de la Noblesse recogneut que les  
villes pouuoient beaucoup pour la  
conseruation de l'Estat, lesquelles  
s'estans volontairement sousmises  
à luy, espargnerent beaucoup de  
sang & d'années qu'il eust esté obli-  
gé de consommer pour les subiu-  
guer par force.

Ce grand Monarque se recognois-  
sant estre l'arbitre & les delices de  
la Chrestienté, formoit de grands  
desseins sur les apparences certai-  
nes de sa puissance, & voulant re-  
stablir son Espargne grandement  
espuisée & debiffée par les excessi-  
ues despenses qu'il auoit esté con-  
trainct de soustenir, entre autres  
choses il donna lieu au Droict An-  
nuel, dōt il receuoit le reuenu sans  
peine, & avec presse, ardeur, & alle-  
gresse des Officiers.

Son Espargne restablie, ses desseins

formez & prests d'esclore, & de remettre la France en son ancienne splendeur, le Ciel l'ayant raüy en ces entrefaictes pour laisser vn Alexandre successeur de Philippes, & vn Salomon heritier des vertus de Dauid pour bastir le téple de Dieu; la couróne a orné vostre teste aussi royale en vertus, qu'en puissance.

La Regence de la Reyne vostre mere s'est escoulée dans vn penible & soucieux exercice de cette grande Princesse, la plus auguste que les histoires ayent iamais remarquée; comme estant veſue du Roy HENRY LE GRAND, mere & belle mere des trois plus grands Roys de la Chrestienté: mere de MONSIEUR, lequel en cette qualité de Frere unique de vostre Maieſté égale tous les autres Roys, & belle mere d'un des plus grands & nobles Ducs de l'Europe; laquelle avec vne grande perple-



perplexité d'esprit a conserué l'Estat en son entier parmy les factiós qui charouilloient l'ambition de quelquesvns dans le desir du desmembremēt de la Couronne souz le phanal de ceux de la Religion pretendue reformée, dans lesquels comme dans vn vlcere enuieilly degeneroiēt toutes les humeurs peccantes de l'Estat.

Les vertus de vostre Maiesté ayās deuancé ses années, & vostre Maiesté ayant pris les resnes du gouvernement, elle resolut de reformer son Estat, & entre autres choses d'abolir la venalité des Offices: Mais la syncerité de ses intentions estant preuenue par la rebellion de ceux qui se seruoient du tiltre de la Religion, l'effect de vostre pieté a esté differé iusqu'à present.

Vos Officiers (SIRE) ne respirent autre chose que l'obeissance &

seruice deuz à vostre Maiesté; c'est le centre auquel les lignes de leurs vœux abboutissent; & n'en peut-on desirer autre preuue plus grande que de voir vos subiets employer tous leurs biens pour paruenir aux charges, & seruir vostre Maiesté à leurs despens, veu que les emoluments des Offices de Iudicature sont grandement au dessoubs du reuenu de leur argent, & neantmoins la Iustice est distribuée à vos subiets avec autant d'intégrité, que si leurs offices leur estoient conferrez gratuitement.

Ce n'est pas l'ambition seule qui iusqu'à present a flatté les esprits dans la douceur des charges; la nécessité y a eu sa bonne part, pour se maintenir contre les plus puissans dans les desordres des guerres ciuiles; & cette nécessité des vns, & l'ambition des autres à la verité a porté



les charges à vn prix excessif, & si monstrueux, qu'il se rencontre beaucoup d'inconueniens soit à continuer la venalité des Offices, & le droict annuel, soit à les supprimer.

Si la venalité & le droict annuel prennent leur train ordinaire, il y va de l'interest de vostre Maiesté; d'autant que la distribution de la Iustice passera successiuellement aux familles côme vn heritage qui leur sera propre; & ne vous restera que le reuenu qui vous en reuiendra en argent: De sorte que le choix des Officiers & la distribution de la Iustice ne dependront plus de vostre Maiesté, ains de vos subiets, & pour la plus grande partie du tiers Estar, au preiudice de la Noblesse, laquelle s'ẽ est veuë decheuë iusqu'à maintenant, & cette venaliré ouuerte luy a serui de subiet ou de pretexte de ses mescontentemens: Et comme

en l'Estat Romain la distributiō de la Iustice ayant esté ostée au Senat pour la donner aux Cheualiers, & les charges ayans commencé d'estre achetées à beaux deniers comptans, la Republique fut changée en Monarchie; au contraire la Noblesse excluse des offices de iudicature, les armes & la generosité de laquelle sont rebuttées de la balance comme vne monnoye descritee, & les charges occupées à prix d'argent, ont donné l'audace aux rebelles de machiner vn Estat populaire, ou vn cantonnement.

L'autre consideration est que les pauvres ou les moins entreprenans languissent souz l'orgueil & le mespris des riches qui les oppriment impunemēt, comme personnes de neant, & la satisfaction desquels est reduite aux simples termes des vains ressentimens, les familles des offi-



ciers s'interessans les vnes avec les autres, en telle sorte qu'il n'y a corps d'as vostre Estat qui leur puisse resister: Et le despit & le chagrin des grāds courages languissans desevoir sans ressource & sans esperance de sortir de la poussiere, & de voir l'argent occuper la place de la Vertu, leur a faict chercher la consolation dans les changemens, laquelle ils ne pouvoyent trouver dans la condition presente.

Voila de grands inconueniens: Il reste d'examiner les autres.

L'experience a fait voir à vostre Maiesté que les villes & les cōmunautéz ont serui d'esquerre à vostre Estat, lequel elles ont maintenu en son entrée contre ceux qui se vouloyent preualoir de vostre bas age pour se cantonner; & toutes se sont maintenues fermes souz vostre obeissance. Cette resistāce aux mau-

uais desseins des brouillós n'a procédé de la simple populace, la pauvreté de laquelle lui eust fait prester l'oreille aux apparences imaginaires d'un bien public; mais bien de vos Officiers, SIRE, qui s'y sont courageusement opposez.

Les respects particuliers vnissent les esprits pour la conseruation publique, dás laquelle ils sont meslez bien auant:& plus vous auez d'Officiers, & plus ils sont interessez dás le prix excessifs de leurs offices; d'autát plus auez vous de subiets qui veillent à la conseruation de vostre Estat, ne fust ce que par la consideration de leur interest: comme ce capitaine Grec Eumenes pourueut à son salut, & preuint durant quelque temps les attentats de ses ennemis contre sa personne, par le soin de ses creanciers.

L'autre consideration est, que les



Officiers estés obligez à vostre Ma-  
iesté seule, de laquelle ils reçoient  
l'honneur de leurs charges, & sans  
qu'ils ayent besoin de l'entremise  
des Nobles, ny de ceux qui appro-  
chent vostre personne, ne diuisent  
leurs esprits ny leur service qu'ils  
côseruent entiers pour V. M. com-  
me estant l'Ocean duquel tous vos  
Officiers deriuent, & y retournans  
luy font hommage comme à leur  
seul principe.

Il est vray, SIRE, que selon les  
vœux communs de tous vos sujets  
il est à desirer que partie des char-  
ges soit restrainte dans vn nombre  
raisonnable d'Officiers, la moin-  
dre de vos prouinces estant suffi-  
sante pour decider toutes les affai-  
res de la France: Mais la difficulté  
de l'exécution semble y resister, &  
opposer la iustice à la iustice mes-  
me. Les Officiers ont achepté che-

rement leurs charges souz la foy de vos Edicts & de vos Predecesseurs: vous estes donc leur garend; leur argent vous a secouru dans la plus grande difficulté de vos affaires.

Le prix excessif des Offices n'est point à la charge publique, mais bié des particuliers, lesquels se sont flattez dans l'esperance de la cōtinuation du droict annuel: la perte ne tombe que sur eux. Et tant plus le droict annuel aura de durée, & moins les familles des Officiers dureront; d'autant qu'y ayant vne insigne disproportion du prix d'iceux à leur reuenu, la despense à laquelle ils sont obligez pour se maintenir dans leur degré mine peu à peu le fond de leur patrimoine; de sorte que leurs offices ne seruēt que pour les faire perir avec plus de lustre, dans vn vaisseau dont les ays foyēt dorez, & les voiles & cordages de foye.

Les



Les pauvres ont de la consolation en ce qu'ils n'ont iamaïs gousté la douceur d'une plus eminente condition; mais la cheute des riches leur est grandement sensible dans leurs changemens; & d'autant plus ils tombent de hault, d'autant plus ils reçoivent d'estonnement: les riches entrent riches dans leurs charges, & en sortent pauvres, soit durant leur vie, soit en mourant: l'extremité est grande: s'ils demeurent dans leurs charges, l'éclat & la dépense les consume, & enveloppe leurs heritiers plus avant dans les ruines de leur débris: s'ils sont contraints de s'en desfaire, ils ont besoin d'une grande solidité d'esprit pour supporter le changement de leur fortune; ils sont reduits à se bannir de la hantise des homes, & chercher l'horreur des deserts & la solitude pour consolation. Bref les Officiers sont à la pointe de la pyramide, & bien loing

que selon le vœu des peres leurs familles s'éleuent, elles tombent dans le penchant, toute la puissance d'un Officier se reduisant à maintenir vn de ses enfans dans la succession de la charge, & les autres languissans dans le déplaisir d'estre en vne condition au dessouz de leur naissance.

Pour le Droict annuel, bien loing d'introduire les successions aux offices dans les familles, au contraire, y fait naistre vne perpetuelle reuolutiō de diuerses personnes qui par leur industrie, ou leur bonheur, ayans acquis des biens, en vsent pour paruenir aux honneurs dans les villes.

La Iustice est tousiours mieux rendue par les riches que par les pauvres: Deux hommes égaux en esprit & en probité paruenans aux charges, le riche plus facilement s'exemptera des concussions que le pauvre, qui n'aura pas les moyens suffisans pour sou-



tenir l'esclat de sa dignité. Et d'autāt plus vn officier a de biēs, d'autant plus donne-il d'arres & de gages de la probité au public. La pauureté est la viue source des mauuaises actions, & les richesses l'instrument des bōnes à qui en sçait vser.

SIRE, du haut d'une montagne en bas il y a de la descente, ou la cheute. Si tout d'un coup vous ostez la venalité des Offices, c'est la cheute; si vo<sup>9</sup> y donnez du temps, c'est la descente. La premiere est mortelle, & l'autre supportable.

Quant au Droict annuel, il dépend de vostre Maiesté de le supprimer: mais elle peut consoler ses subiets en leurs grandes & ruineuses pertes en donnant des suruiuances aux enfans de ceux qui ont vieilly dans les charges, & pour preuue qu'ils sont gens de bien, font voir qu'ils n'ont appor-

ré aucune augmentatiō en leurs biēs: Ou bien si les officiers sont preuenus de mort, preferez leurs enfans, s'ils en ont de capables; ou s'ils n'en ont point de cette qualité, donnez leur recompense sur les mesmes charges payables par ceux qui en serōt pourueuz: Ainsi peu à peu les choses reprendront le premier & ancien train de leur pureté.

Dieu est autant ou plus admirable en ce qu'il est iuste, qu'en ce qu'il est eternal; sa iustice est la preuue qu'il est impassible, & non subiect aux affections qui marquent l'infirmité humaine. Vous estes son image viue en la terre: la pieté, la valeur, la conduite, la clemence, & autres vertus Royales dont Dieu vous a doüé plus qu'aucū Monarque qui iamais ayt esté sur la terre, & plus heureux qu'eux tous en ce qu'ayant toutes leurs vertus vous n'en auez pas les vices. Toutes ces



belles qualitez cedent à celle de Iuste qui vous est acquise par le consentement commun de l'univers, la iustice estant l'objet de vos armes, pour guarir la maladie d'esprit des rebelles, & les reduisant dans les termes de l'obeyssance qu'il vous deuroient par election, quand mesmes ils ne seroient vos subiects par naissance; & pour maintenir les estrangers contre l'oppression de ceux qui n'ont autres respects que l'auancement de leurs Estats.

Vos Officiers de iudicature esperent la mesme iustice de vostre Maiesté, & que rendant tous les ordres de vostre estat égaux, la nondination ouuerte qui se pratique aux gouuernemens, aux benefices & aux charges militaires, & de ceux qui ont l'honneur de seruir vostre Maiesté estans effacée de la face de la terre; la vertu & la probité seront les seuls degrez pour

monter aux charges, & les esprits s'aiguifans eux-mesmes pour y paruenir, ne donneront le prix aux richesses que pour la necessité; & garderont leur fidelité entiere pour vostre seruice, laquelle par le malheur du tēps s'est trouuée enueloppée dans la venalité vniuerselle & ouuerte de toutes choses.

SIRE, l'autre poinct est, Que vos peuples esperent du soulagement de vostre Maiesté. Anciennement les trois Estats consentoyent des subuētions aux Roys vos predecesseurs en la durescé & plus grande difficulté de leurs affaires. Souz les regnes des Roys Charles cinquiesme & sixiesme l'Histoire marque les troubles excitez par le Roy de Nauarre & les Ducs de Bourgogne lors de l'introductiō des Aydes. Charles VII. leua le premier la Taille sans en demander autre aduis qu'à son autorité royale. Le Roy



Louys XII s'est acquis ce beau nom de PERE DV PEUPLE par la diminution des Tailles. Mais les grandes guerres par luy souffertes contre toute l'Europe ont entraîné l'alienation du domaine de la Couronne; ce bon Roy se saignant luy mesme pour espargner la substance de son peuple.

La dissension d'entre le Roy Philippes le Bel & Boniface VIII Pape, le changement du Siege Pontifical de Rome en Auignon, le ressentiment qu'en auoit l'Italie, & l'assemblée de Pise faicte souz l'autorité du Roy Louys XII, auoyent aigri la cour de Rome avec toute l'Italie contre la France en faueur de la maison d'Autriche.

Cette animosité s'estendit au regne du Roy François I. lequel pour coniurer vne si grande tempeste, a esté contraint d'augmenter les Tailles & les Aydes; & les troubles qui

ont fuiuy le decez du Roy Henry II. les ont encheries iusqu'à present: & vos peuples recognoissans la necessité de vos affaires, & de quel pied vo<sup>9</sup> auez procedé pour couper la source & la racine des diuisions, ont tresvolontiers contribué plus qu'ils ne pouoyent, compatissans aux trauaux & soing infatigable de vostre Maiesté qui mesprisoit sa propre santé pour apporter la conseruation & le salut à ses subiets.

Voyons à present l'estat de vos affaires. Vostre domaine est aliené, & vos peuples sont espuisez: Voila deux grandes extremitez. Ce qui diminue la plainte de vos peuples, est qu'eux-mesmes ont participé aux factions, & ceux qui n'ont respiré que vostre seruice y ont esté enueloppez. C'est le malheur des guerres ciuiles, que les mauuais conseils rejallissent sur ceux qui



qui n'y trempent pas, & les brouillōs seuls profitent dans la perte des gens de bien.

La tranquillité ne peut estre establie dans les royaumes sinon par la vigueur des armes: les armes ne peuvent subsister sinon par le payement des soldats, avec les autres frais de la guerre: & les fraiz de la guerre ne peuvent estre supportez sinon par les Tailles & les Aydes: Et la condition de ceux qui souffrent les fatigues & les hazards de la guerre est beaucoup plus dure, que de ceux qui ne contribuent que de leur argent, par le moyen duquel ils achètent leur repos.

Dieu vous a doüé, SIRE, de toutes les grandes qualitez requises au plus noble Roy de la terre, pour biē regner en terre & en paix, d'un conseil duquel le sens net & aigu pene-

tre dans les pensées les plus sombres & les plus enueloppées de ceux qui vous veulent deffervir; de Princes & d'officiers de vostre Couronne & de gentilshommes qui rêdent la fabuleuse antiquité des Romans possible & veritable en leurs personnes.

Le soulagement de vos peuples ne peut estre esperé sinó peu à peu, & par succession de temps. Entre le mal & la guerison le remede veut du delay.

Vostre Royaume, SIRE, est le plus fertile de l'Europe, & pour peu que vous soulagiez vos peuples d'année en année successiuelement à proportion que vous deschargerez aussi vostre Espargne du payement des gages d'une multitude effroyable d'Officiers, lors que vous les supprimerez par la vacation des offices



par mort; vos subiets auront non seulement loisir de respirer, mais de s'êrichir, & de vous secourir aux occasions qui se presenteront.

SIRE, ceux qui sont au bas de la montagne ne sont capables de cognoistre ce qui est dans le sommet d'icelle; mais bien il tombe souz le sens commun des hommes, *Que la richesse des peuples est la richesse des Roys.* Cyrus voulant experimenter la fidelité des Perses, fit publier à son de trompe qu'il luy estoit survenu vne affaire perilleuse & de grande importance, & que chacun l'aidast de ses biens selon sa puissance, & mist son seing & son sceau afin d'estre recogneu: Il recueillit le fruit de la vertu, & du bon traitement qu'il faisoit à ses peuples; & leur ayde & contribution franche & du propre mouuemēt de leurs esprits

ayant surpassé de beaucoup les grâds thresors qu'il eust peu amasser par vne longue suite d'années, il trouua que son plus bel heritage consistoit au cœur de ses subiets.

SIRE, l'histoire ne marque point de Roy si aimé ny si honoré de ses subiets & des estrangers que vous: chacun recognoissant par la sagesse de vos conseils, vostre valeur, & patience à les executer, & la felicité des euenements, que Dieu vous conduist par la main: vous estes le support de vos amis, la terreur de vos ennemis, le refuge des affligez, & le subiet d'admiration à tout l'Vniuers, qui croit que c'est se bander contre Dieu que de s'armer contre vous, parce que la Raison est l'ame de vos desseings, & la Iustice le but de vos armes.



Puissiez vous, GRAND ROY, passer les années de Charlemagne, & dans la longueur & vigueur de vos iours cueillant les fruiçts de vostre vertu, dóner à vos subiets ceux de vostre mariage qui porteront la generosité des maisons de Bourbon & d'Austriche, desquelles vostre Maiesté estant issue, prouignera les vertus de ces deux augustes familles par vne suite de nepueux.

Le Ciel ne peut denier, que de plus grand Roy de la terre & de la Reyne incomparable en beauté d'esprit & de sa personne, il ne naisse vn successeur qui portera la douceur d'un fruiçt doublement enté dans les deux couronnes de France & d'Espagne: & la fleur de vos aages, la conformité de vos esprits, la tranquillité publique, & les vœux & prieres de vos subiets portées ius-

qu'en haut dans la chaleur de leurs  
souspirs imploreront de Dieu vn  
Dauphin, ornement de vostre liect  
nuptial & d'un parfaict amour, aussi  
extraordinairement borné en vn  
grand Roy ieune & victorieux, qu'il  
est accomply en vne Reyne parfai-  
cte en beauté & en chasteté.



Handwritten text in a cursive script, likely a signature or a short note, located in the upper left corner of the page. The ink is dark and the handwriting is somewhat stylized and difficult to decipher.

Up at a Mr. Courtwright  
Lafayette, as I was, at  
Garretts place, the  
Madam, the young man

---



